

• Гуртысь нылкышноослэн нуналзылы

Мария МАМОНТОВА, туспуктйз Максим ЕГОРОВ

Жильыртйсь чуръёсазы – сюлэм вöсьсы

«Удмурт нылкышно кенеш» огазеясконлэн кичöлтэмез улсын гуртъёсысь гожъяськись кышномуртъёслэн кылбуръёсынызы тунсыко бичет потйз. Отчы Можга ёросысь авторъёслэн чуръёсы но пыризы. Соос пöлын Луджи-Шуджи гуртысь Надежда Иванова, Александровоысь Римма Рылова но Быдзымсурдысь Любовь Чукарева.

4-тй коньывуонэ Иж-карысь Йöскалык библиотекаын «Нылкышно дауре» книгаен тодматскон ортчиз. Татчы тодосчиос, иворчиос но авторъёс люкаськизы. Книгаез дасян бордын ужазы «Удмурт дунне» газетлэн редакторез Елена Миннигараева но «Кенеш» журналлэн редакторез Анастасия Шумилова.

Елена Васильевна-лэн верамезъя, кема дыр çоже солэн йыраз бергаз юан: малы кылбурало гуртын улйсь нылкышноос, мар тужгес но сюлмаськытэ соосты?

– Удмурт кышномуртлэн улонэз ноку капчи öй вал. Вазь çукнаисен бер жытозь со тыршиз юртъер котыраз, пудо сиён дасяз, етйн ишкиз-сэстйз, нюлэс кораны но, турын турнаны но, емыш бичаны но, дйсь вурыны-тупатъяны, пöраськыны, бусыын аран висказ пинал вайыны но, нылпиоссэ утыны, визьманы, вöзысьтыз кузпалызы оскымон эш но юрттйсь луыны вуттылйз... Бадзым ныпъет но бадзым оскон. Но адями – корт öвöл. Туж секыт вакытаз аслэсьтыз жадемзэ,



«Кенеш» журналлэн редакторез Анастасия Шумилова но «Удмурт дунне» газетлэн редакторез Елена Миннигараева

сюлэм вöсьёссэ удмурт нылкышно буйгатъяз кырзанэн. Мае малпаз, мар пумысен куректыз – со сярись ик гурлаз. Макем сюлэме пырисесь со калык кырзанъёс! Но котькуд калык кырзанлэн вань кыче ке дауръёсы ышем-вунэм авторез. Чемысь – гуртысь огшоры кышномурт. Вакытёс воштысько ке но, гуртысь удмурт нылкышнолэн пуш дуннез сйче ик турлы-турлы, ненег но бугырес. Со озыы ик

бураса вера. Та книгае пырем нылкышноос но чуръёсы пыр потто пуш малпанъёссэз, куректонъёссэз но шумпотонъёссэз. Кин ке быдэс улонзэ колхозын ужамын, кин ке – дышетйсьын, бухгалтерын. Кин ке вить пиналзэ будэтэ, кин ке сомында ик нунокъёссэ уте-чаклани. Та нылкышноос пöлысь куд-огез трос аръёс çоже кылбура, печатлаське ни, нош кин ке кылбурамез сярись öз вералля, чуръёссэ

али гинэ калыке поттыны дйсьтйз. Валамон, чуръёсы но туж пöртэмез. Соос, калык кырзан-веранъёс сямен, мед вуозы лйдйсь доры, – шуиз Елена Миннигараева.

Нылкышноослэсь чуръёссэс лйдйыса валаны луэ, кыче малпанъёсын, куректонъёсын но осконъёсын уло туала гуртоос. Кылбуръёсазы вордскем пальёссэс яратон, бырем гуртсылэсь мöзмон, аръёслэн укыр жог орт-

чемзы пумысен öпкелён шöдйське.

Виль бичетэ 30 авторъёс пыризы. Ваньзы соос туж пöртэмез. Кинлэн ке вань вылй дышетскемез, кинлэн ке – öвöл. Соос пöлын – визьнодасьёс, дышетйсьёс, лйдъясь-чотасьёс, крестьян возёсьёсын пöртэм ужъёсын вырисьёс, фермеръёс, кивалтйсьёс, трос нылпй анайёс, пенсионеръёс но мукетъёсыз.

– Туннэ нуналлы кылмес, культурамес утисьёс-возисьёс – çапак гуртъёсын улйсь нылкышноос. Пичи дор, инкуазь, анай кыл, ужась адями – ваньмыз та удмурт калыклэн лулчеберетэзлэн шорсюлмыз луэ, сое ик данъяло кылбура кышномуртъёс. Соослэн кужмо но ненег, жож но чебер куараоссы кема-кема аръёс çоже мед шулдыртозы на улонмес, – сйзиз «Кенеш» журналлэн валтйсь редакторез Анастасия Шумилова.

Виль бичет пумысен асьсэлэсь малпанъёссэс озыы ик веразы литературовед Любовь Фёдорова, Йöскалык прессалэн юртэныз кивалтйсь Зинаида Рябинина, «Удмурт Кенеш» огазеясконлэн вице-президентэз Елена Ленцова но мукетъёсыз. Та книга улоньын но историын ас интызэ шедьтоз, пусйизы соос. Авторъёс но асьсэлэсь мылкыдзэс шараязы. Кылсярысь, Александрово гуртын улйсь Римма Рылова пусйиз:

– Ми, гуртын будэм но пыр улонмес гуртын ик ортчытэм нылкышноос, котькуд тулыс, инкуазьлэсь сайкамзэ адйыса, тöдь-тöдь пурзись льöмпулэн зыныныз кудзйса, пöсь гужем вырйылысь кисьмам узы-борыез бичаса, зарни сйзьыллэн чеберезлы синмаськыса, кезыт тöллэн укно вылысь синпöртман пужыосызылы паймыса, ноказыы но ум чидаське вань со чебер суредъёс сярись сюлмасьтымы кисьтйськись чуръёсты гожтыса кельтытэк. Ми, зэмоз кылбурчиосын çошатыса, ум быгатйське, ум но тыршиське гожтосъёсамы çошатонъёсты, эпитетъёсты, метафорасты – пöртэм чеберман

амальёсты – пыртылыны. Гожтйськом огшоры чуръёсын, чакласькомы ритмез но рифмаосты гинэ. Рифмаосмы но милям огшорыесь. Асьмелэн удмурт кылмы сокем жингрес, чик секытэз öвöл такмакъёс выллем чуръёс кылдытыны. Кыззы уд сйзый чебер кыльёстэ анаедлы, вордйськем шаередлы, доредлы, анай кылмылы, инкуазьмылы – ваньмызлы, мар сюлэмез шугъяськытэ. Мон, кылсярысь, 90-тй аръёсы быдэс книгае тэрымон гожъяй вал «Удмурт дунне» газетэ пичись гожтосъёсме «Вераме потэ» сэреге. Котькуд номерын сямен печатласькылызы соос. Нош көня зечкылан кылбуръёс гожтэмын! Ог 200–300 пала вань, дыр. Вань ужъюлтошъёсме, çыжы-выжыосме, гуртоосме, калыкмылэсь дано пиоссэ но нылъёссэ котырес лйдпусъёсынызы соослы гинэ тупась чуръёсын зечкыласько. Огшоры «тазалик но шудбур сйзисько» шуэм сюлэмез уг вырзйты, нош кылбур ке юбилярлы сйзиськод – адями соку ассэ со нуналэ дуннеысь самой шудоен лйдъя ини. Нош кыче бадзым шумпотон басьтйськод, куке тынад кылбуредъя крезьгур ке гожтйське, со кырзан эфирьин ке чузъяське, кылзйсьёслы ке кельше! Крезьгурчиослы бадзым тау, мынам тани сизыым кылбур-кырзанъёсы чузъясько ини «Мынам Удмуртие» радио пыр. Ваньмыз 15 кылбуре кырзан луэмын ини, ми соосты «Зарни сйзьыл» ансамбленымы кырзаськом. Мынам малпаея, асьме удмурт кылмы кема возиськод на, чебересь кырзанъёсмылы луыса. Егитъёсмы öз ке но вераське анай кылынызы, сюлэмез поэртйсь кырзанъёсмес кылзйтэк но кырзатэк соос уз чидалэ.

Виль бичетэн тодматскон ужрад капчи мылкыдын ортчиз. Котькуд авторлы быдэн вить книга кузьмамын вал. Тиражлэн оглюкетэз ёрос библиотекаосы келяны чакламын на. Озыен, виль бичетэн Можга ёрос лйдзетъюртын тодматскыны быгатоы.



«Нылкышно дауре» бичетэ 30 авторъёс пыризы

Вуоно номерез потоз 28-тй коньывуонэ 2021-тй арын.

Приложение «Виль даур» АУ УР «Редакция газеты «Можгинские вести» (6+)

Ответственная за выпуск удмуртского приложения М.И. МАМОНТОВА.

Соучредители: Автономное учреждение Удмуртской Республики «Редакция газеты «Можгинские вести», Администрация муниципального образования «Город Можга».

Свидетельство о регистрации средства массовой информации ПИ № ТУ18-00692 от 15 апреля 2019 года выдано Управлением Федеральной службы по надзору в сфере связи, информационных технологий и массовых коммуникаций по Удмуртской Республике.

Адрес редакции, издателя: 427790, Удмуртская Республика, город Можга, улица Интернациональная, 30.

Адрес электронной почты: mvesti@inbox.ru.

Телефоны для справок: 3-18-07, 8-991-456-44-11.

Газета напечатана в типографии ИП Брехова А.А., расположенной по адресу: Удмуртская Республика, город Ижевск, улица Короткова, дом 19а. Выпускается два раза в месяц по четвергам. № 19 от 14 октября 2021 года. Тираж – 320 экз. Цена за 1 экз. – 7 рублей.